

NÜXĨRAÜXÜ GA POPERA GA CUÁŮ ÜMATÜXÜ

Ore i tüxü maxëëxüchiga

¹ Pexcèx tanaxümatü nachiga ya Tupana Nane ya Cristu ya yima woetama marü nüxĩra yexmacü ga yexguma noxritama tauta naãne üxgu. Rü nüma rü Ore i Maxëëëruü nixĩ i naega erü nüma nixĩ i tamaã nüxü yaxuxü i Tupanachiga rü tüxü namaxëëëxü. Rü toma ga norü ngüexüğü na tixüğüxü, rü nüxü taxĩnüë rü toxetümaã nüxü tadaugü rü tomëxmaã nüxü tingögüğü. ² Rü yima Maxëëëruü ya Cristu rü toxü nüğü nawëx. Rü nüxü tadaugü rü duüxüğümaã nüxü tixu na ñuxácü yixü. Rü ñuxma rü pemaã rü ta nüxü tixuchiga ya yima Cristu ya tüxna naxácü i maxü i taguma gúxü. Rü noxri rü Nanatüxütawa nayexma, natürü ñoma ga naãnewa nangu rü toxcèx nangox. ³ Rü yema toma nüxü tadaugüxü rü nüxü taxĩnüëxü rü pemaã nüxü tixu na tomücüğü pixüğüxüçèx, ngëxgumarüü i toma na Tanatü ya Tupana rü Nane ya Ngechuchu ya Cristumücüğü tixüğüxürüü. ⁴ Rü ngëmacèx pexcèx tanaxümatü i ñaã ore na wüxigu aixcümáxüchi itaãëgüxüçèx.

Ñoma ngóonexürüü name ya Tupana

⁵ Rü ñaã nixĩ ga ore ga tomaã nüxü yaxuxü ga Ngechuchu ya Cristu. Rü pemaã nüxü tixu na ñoma ngóonexürüü namexü ya Tupana, rü nawa

rü nataxuma i chixexü i ñoma éãnexürüü ixixü, rü bai i íraxü. ⁶ Rü ngëxguma chi:

“Tanatü ya Tupanamücügü tixígü”, ñagügu, natürü chixri imaxëgu, rü tidoraemare erü tama aixcüma meã tamaxë. ⁷ Rü ngëxguma chi Tupanarüü ngóonexüwa imaxëgu, rü yigümücügü tixígü i yixema, rü Tupana Nane ya Ngechuchu rü nagümaã tüxü inayanatauxëë i guxüma i tórü chixexü. ⁸ Ngëxguma chi nüxü ixuxgu rü:

“Changearü pecaduãx”, ñagügu, rü yigütama tawomüxëë, rü tidoraemare. ⁹ Natürü ngëxguma chi Tupanamaã nüxü ixuxgu i tórü pecadugü, rü nüma tüxü nüxü nangechaü rü tüxü inayanatauxëë i guxüma i tórü chixexü, erü nüma rü mecü nixĩ rü taguma tüxü nawomüxëë. ¹⁰ Natürü ngëxguma chi:

“Tangearü pecaduãxgü”, ñagügu, rü doratèex nüxü tawogü ya Tupana rü tama aixcüma tawa nangëxma i norü ore.

2

Cristu rü tórü chogürüü nixĩ

¹ Pa Chauxacügüx, pexcèx chanaxümatü i ñaã ore na tama chixexü pexügüxücèx. Natürü ngëxguma chi wüxie chixexü üxgu, rü nangëxma ya tümaëtüwa chogücü nüxna ya Tanatü ya Tupana na tama tüxü napoxcuxücèx. Rü yima nixĩ ya Ngechuchu ya Cristu ya aixcüma mecü ixïcü. ² Rü guma Ngechuchu ya Cristu rü nügü inaxã rü nayu na naxütanüãxücèx ga tórü pecadugü. Rü tama tórü pecadugüxicatama naxütanü, natürü guxüma i duüxügüarü pecadugü ta naxütanü. ³ Rü ngëxguma

chi naga ixĩnũegu i ngẽma tũxũ namuxũ ya Tupana, rũ nũxũ tacuèx na aixcũma nũxũ icuáxũ.

⁴ Rũ ngẽxguma chi wũxie:

“Choma rũ Tupanaxũ chacuèx”, ñagũgu, natürü tama naga taxĩnũgu i ngẽma tũxũ namuxũ ya Tupana, rũ wũxi i doratèxáxũ tixĩ. ⁵ Natürü yixema naga ñnũxẽ i ngẽma tũxũ namuxũ ya Tupana, rũ aixcũmaxũchi Tupanaxũ tangechaũ. Rũ ngẽmawa nũxũ tacuèxgũ na aixcũma Tupanaãrũ duũxũgũ ixĩgũxũ. ⁶ Rũ yixema:

“Tupanaãrũ duũxũ chixĩ”, ñagũxe, rũ name nixĩ na meã tamaxũxũ yema Ngechuchu ya Cristu meã maxũxũrũ.

Tupanaãrũ mu i ngexwacaxũxũchiga

⁷ Pa Chaueneëgũx, tama wũxi i ngexwacaxũxũ i Tupanaãrũ mu nixĩ i pexcèx chaxũmatũxũ. Natürü ñããtama noxrĩarũ ügũgumama pexũ yexmaxũ ga mu nixĩ. Rũ ñããtama nixĩ i Tupanaãrũ mu ga nuxcũmaũxũ ga marũ nũxũ pexĩnũèxũ. ⁸ Natürü ñãã Tupanaãrũ mu i pexcèx chaxũmatũxũ rũ guxũguma nangexwacaxũ. Rũ ngẽxguma naga pexĩnũegu i ñãã Tupanaãrũ mu na pegũ pengechaũgũxũ, rũ tama èãnexũwatama pemaxẽ, natürü Cristurũ ngẽma ngóonexũ i aixcũma ixĩxũwa pengẽxmagũ. ⁹ Rũ ngẽxguma chi wũxie:

“Choma rũ ngẽma ngóonexũwa changẽxma”, ñagũgu, natürü tũmaẽneẽchi taxaixgu, rũ èãnexũwatama tangẽxma. ¹⁰ Yixema tũmaẽneẽxũ ngechaũxẽ rũ ngóonexũwa tamaxũ, rũ taxucèxma tũxcũũ pecadu taxũ. ¹¹ Natürü yixema tũmaẽneẽchi aixe, rũ èãnexũwatama tamaxũ, rũ èãnexũgu tixũ. Rũ tama nũxũ tacuèx na ngextá taxũxũ, erũ

tümacèx naxëãne. ¹² Pa Chauxacügüx, pexcèx chanaxümatü erü Cristugagu Tupana marü pexü nüxü nangechaü i perü pepadugü. ¹³ Pa Papágüx, pexcèx chanaxümatü i ñaã ore erü nüxü pecuèxgü ya Tanatü ya Tupana ga noxriarü ügügumama yexmacü. Pa Ngextüxcügüx, pexcèx chanaxümatü erü marü nüxü perüyexera i ngëma ngoxo i Chataná i chixexüärü üruü. ¹⁴ Pa Buxügüx, pexcèx chanaxümatü erü marü nüxü pecuèxgü ya Tanatü ya Tupana. Pa Papágüx, pexcèx chanaxümatü erü marü nüxü pecuèxgü ya Tanatü ya Tupana ga noxriarü ügügumama yexmacü. Pa Ngextüxcügüx, pexcèx chanaxümatü erü peporae, rü guxüguma peãewa nangëxma i Tupanaärü ore, rü marü nüxü perüyexera i ngëma ngoxo i Chataná i chixexüärü üruü. ¹⁵ ;Tãxü i pexü nangúchaüxü i ñoma i naãne rü norü ngëmaxügü! Ngëxguma chi texéaxü nangúchaügu i ñoma i naãne rü tama Tanatü ya Tupanaxü tangechaü. ¹⁶ Erü guxüma i ngúchaügu i ñoma i naãnewa ngëxmaxü rü ñoma i naãneärütama nixĩ rü tama Tupanaärü nixĩ. Rü ngëma ngúchaügu rü ngëma nixĩ i taxüneärü ngúchaügu, rü taxetüarü ngúchaügu, rü yigü na icuèxüügüxü tórü ngëmaxügümaã. ¹⁷ Natürü ñoma i naãne rü guxüma i ngúchaügu i nawa ngëxmaxü rü tá nagux. Natürü yíxema Tupanaga ñnüxë rü guxügutáma tamaxü.

Ore i aixcüma ixüchiga rü ore i dora ixüchiga

¹⁸ Pa Chauxacügüx, paxa tá nagux i ñoma i naãne. Pema rü marü nüxü pexñüchiga rü tá ínangu i wüxi i Cristuarü uwanü, natürü marü ínangugü i muxüma. Rü ngëmawa nüxü tacuèx na marü

nagúxchaũxũ i ñoma i naãne. ¹⁹ Rũ ngẽma Cristuarũ uwanũgũ rũ tatanũwatama nangẽxmagũchirẽx, natürũ tama aixcũma tatanũxũ nixĩgũ, erũ ngẽxguma chi tatanũxũ yixĩgũgu rũ tatanũgu chitama narũcho. Natürũ marũ tatanũwa ínachoxũ na meãma nũxũ icuáxũcèx na tama aixcũma tatanũxũ yixĩgũxũ. ²⁰ Natürũ pema rũ Cristu marũ pexna nanamu i Naãe i Üünexũ, rũ ngẽmacèx meãma nũxũ pecuèx i Tupanaãrũ ore. ²¹ Rũ ñuxma rũ tama nixĩ na tama nũxũ pecuáxũcèx na pexcèx chaxũmatũxũ. Natürũ pexcèx chanaxũmatũ erũ marũ meãma nũxũ pecuèx i ngẽma ore i aixcũma ixĩxũ. Rũ nũxũ pecuèx rũ ngẽma ore i aixcũma ixĩxũwa rũ nataxuma i dora. ²² ¿Texé tiĩxũ ya yíxema idoratèxáxe? Yíxema:

“Ngechuchu rũ tama aixcũma Cristu ya Tupana Nane nixĩ”, ñagũxe, tixĩ ya idoratèxáxe. Yíxema tixĩ ya Cristuarũ uwanũ, erũ tama nũxũ tacuáxchaũ ya Tanatũ ya Tupana rũ Nane ya Ngechuchu. ²³ Guxãma ya yíxema tama nũxũ cuáxchaũxẽ ya Tupana Nane ya Ngechuchu, rũ tama nũxũ tacuáxchaũ ta ya Tanatũ ya Tupana. Natürũ yíxema Ngechuchuaxũ yaxõxẽ, rũ Tanatũ ya Tupanaãxũ rũ ta tayaxõ. ²⁴ Rũ ngẽmacèx name nixĩ i peyaxõgũama i ngẽma ore ga noxri nũxũ pexĩnüèxũ. Rũ ngẽxguma peyaxõgũamagu i ngẽma ore ga noxri nũxũ pexĩnüèxũ, rũ aixcũma norũ duũxũgũ pixĩgũ ya Tanatũ ya Tupana rũ Nane ya Ngechuchu. ²⁵ Rũ nũmatama ya Ngechuchu ya Cristu nixĩ i tamaã inaxunetaxũ na tũxna naxããxũcèx i maxũ i taguma gúxũ. ²⁶ Nangẽxma i duũxũgũ i chixexũwa pexũ gagũchaũxũ. Rũ ngẽmachiga nixĩ i pexcèx chanaxũmatũxũ i ñaã ore.

27 Natürü pema rü marü Cristu pexna nanamu i Naãe i Üünexũ, rü guxũguma pewa nangẽxma. Rü ngẽmacèx tama penaxwèxe i to i perü ngúexẽxũ erü nümatama i Naãe i Üünexũ rü pexũ nangúexẽẽ i guxũma. Rü norü nguxẽẽtae rü aixcüma nixĩ rü tama dora nixĩ. Rü ngẽmacèx name nixĩ na guxũguma Cristuaxũ peyaxõgũxũ, ngẽma Naãe i Üünexũ pexũ ngúexẽẽxũãcüma. 28 Rü ñuxmax, Pa Chauacügũx, rü name nixĩ na meãma Cristuaxũ peyaxõgũxũ na tama nüxũ imuũẽxücèx, rü tama ixãneẽxücèx napèxewa i ngẽxguma wena nuã naxũxgu. 29 Pema nüxũ pecuèx na Cristu rü aixcüma mecü yĩxũ. Rü ngẽxgumarũũ ta name nixĩ na nüxũ pecuáxũ na guxũma i duũxũgü i mexũ ügũxũ rü Tupanaxãcügü na yixĩgũxũ.

3

Tupanaxãcügüchiga

1 ;Dücèx, Pa Chaueneẽgũx, ñuxãcü poraãcü tüxũ nangechaũ ya Tanatü ya Tupana! Rü ngẽmacèx nixĩ i naxãcügümaã tüxũ naxuxũ i nümax. Rü aixcüma naxãcügü tixĩgü. Rü ngẽmacèx ñoma i naãnecũãx i duũxũgü rü tama tüxũ nacuáxchaũ erü Tupanaxũ rü ta tama nacuáxchaũgü. 2 Pa Chaueneẽgü ya Pexũ Changechaũgũxe, ñuxma rü marü Tupanaxãcügü tixĩgü woo tama tüxũ nüxũ nacuèxẽẽ na ñuxãcü tá ixĩgũxũ i yixcüra. Natürü nüxũ tacuèxgü na Ngechuchurũũ tá ixĩgũxũ i ngẽxguma nangõxgu, erü tá nüxũ tadaugü na ñuxãcü yĩxũ i nümax. 3 Rü guxãma ya yixema yaxõxẽ na Ngechuchurũũ tá tiixũ, rü tügüna tadau na Ngechuchu ya Cristurũũ

aixcūma Tupanapēxewa tamexū. ⁴ Natürü guxāma ya yíxema pecadu úxe, rü Tupanamaã chixexū taxū. Erü ngēxguma tama Tupanaga taxīnūgu, rü tapecaduāx. ⁵ Pema nüxū pecuèx rü Ngechuchu ya Cristu rü ñoma ga nañewa naxū na iyanaxoxēēãxúcèx i tórü pecadugü. Rü nūma rü taguma pecadu naxū. ⁶ Rü ngēmacèx guxāma ya yíxema aixcūma nüxū yaxōgūxe, rü tama pecadu taxügüecha. Natürü guxāma ya yíxema pecadu üechaxe, rü ngēmaãcü tamaxē erü taguma Cristuxū tadau, rü taguma nüxū tacuèx. ⁷ Pa Chauzacügüx, jtāxū i naga pexīnūèxū i ngēma duūxūgü i pexū iyarütaxexēēchaūxū! Yíxema mexū úxe rü aixcūma mecü tixī, ngēxgumarūŷ ya Cristu na aixcūma mecü yiixūrūŷ. ⁸ Natürü yíxema pecadu üechaxe rü ngēmawa tūxū tacuèx na Chatanáärü duūxū tiixū, erü nūma i Chataná rü noxriarü ügügumama pecadu naxüecha. Rü yemacèx ga Tupana Nane rü ñoma ga nañewa naxū na iyanaxoxēēãxúcèx ga yema Chataná üxū. ⁹ Rü yíxema Tupanaxãcü ixīxē rü tama pecadu taxüecha, erü naxãcüxüchi tixī. Rü taxuacūma pecadu taxüecha erü Tupana nixī ya tümanatü. ¹⁰ Yíxema chixexū úxe rü tūmaēneēchi aixe, rü tama Tupanaxãcü tixī. Rü ngēmawa nüxū tacuèx na texé tixīgüxū ya Tupanaxãcügü rü texé tixīgüxū ya Chatanáãcügü.

Name nixī na yigü ingechaūgüxū

¹¹ Rü yexguma noxritama pexū tangüexēēgu, rü pemaã nüxū tixu na guxāma yigü ingechaxūgüxū. ¹² Rü tama tanaxwèxe na Caīrūŷ ngoxo i Chatanáãcü ixīgüxū. Yerü nūma rü naēneēxū

nimèx. ¿Rü tacüçèx nixĩ ga yamáãxũ? Nayamèx yerü yema nüma naxüxũ rü tama name, rü yema nañeñ üxũ rü name. ¹³ Pa Chaueneëgüx, jtãxũ i pebaixãchiãëgüxũ ega pexchi naxaiegu i ñoma i naãnecũãx i duũxũgü! ¹⁴ Yixema rü marü nüxna ítanguxũ i ngẽma yu rü ñuxma rü marü maxüwaama tangẽxmagü. Nüxũ tacuèxgü i ngẽma erü nüxũ tangechaũgü i taeneëgü. Yixema tama tümaëneëxũ ngechaũxê rü yuwatama tangẽxma. ¹⁵ Rü yixema tümaëneëchi aixe rü wüxi i máëtaxürüũ tixĩ. Rü pema nüxũ pecuèxgü i wüxi i máëtaxũ rü nüxũ nataxuma i norü maxũ i taguma gúxũ. ¹⁶ Rü Ngechuchu ya Cristu rü tórü pecaducèx nayu, rü yemaãcü tüxũ nüxũ nadauxêë i ngẽma ngechaũ i aixcüma ixĩxũ. Rü ngẽxgumarüũ ta i yixema, rü tanaxwèxe na ímemarexũ na nüxũ rüngüxêëxũ i taeneëgü woo ngemagu iyuxgu. ¹⁷ Natürü ngẽxguma chi wüxi i yatüãxũ nangẽxmagu i muxüma i norü ngẽmaxũgü, rü chi nüxũ nadèuxgu i namücü na nüxũ nataxuxũ, rü taxuacüma:

“Choma rü Tupanaxũ changechaũ”, ñanagürü, ega tama nüxũ nangüxêëgu i namücü. ¹⁸ Pa Chauzacügüx, tama name i taèxmaã rü tórü ore-maãxĩcatama nüxũ tangechaũ i taeneë. Natürü tanaxwèxe i tórü maxümaã rü tórü ü i mexümaã nüxũ tangechaũ.

Tama taxãneë na Tupanana ingaicamagüxũ

¹⁹⁻²⁰ Rü ngẽxguma aixcüma yigü ingechaũgügu, rü nüxũ tacuèx na aixcüma naga ixĩnüëxũ i ngẽma ore i aixcüma ixĩxũ, rü Tupanapëxewa rü aixcüma naxãcügü ixĩgüxũ, woo ngẽxguma taãëwa nagu rüxĩnügu rü:

“Tama Tupanaxãcü chixĩ”, ñagügu. Erü nüxũ tacuèx rü Tupana nixĩ i taãëärü yexera, rü nüma nüxũ nacuèx i guxũma. ²¹ Pa Chaueneëgü ya Pexũ Changechaũgüxex, ngëxguma taãëwa nüxũ icuèxgu na Tupanaxãcüxüchi ixĩgüxũ, rü tama taxãneë na nüxna ingaicamagüxü ya Tanatü ya Tupana. ²² Rü nüma tá tüxna nanaxã i guxũma i tacü i naxcèx ícaxü erü naga taxĩnüë i ngëma tüxü namuxü rü tanaxü i ngëma nüma namaã nataãëxü. ²³ Rü nüma tüxü namu na Nane ya Ngechuchu ya Cristuaxü yaxõgüxü rü yigü ingechaũgüxü, yema nüma tüxü namuxüãcü. ²⁴ Rü yixema naga ñnüëxë i ngëma Tupana tüxü muxü, rü aixcüma Tupanaärü duüxügü tixĩgü rü nüma ya Tupana rü aixcüma tümawa namaxü. Rü ñuxma rü nüxũ tacuèx na aixcüma Tupanaärü duüxügü ixĩgüxü rü tawa namaxüxü, erü Naãë i Üünexü ga tüxna namuxü tüxü nüxũ nacuèxëë.

4

Yixema tüxü nangëxmaxë i Tupanaãë i Üünexü rü yixema tüxü nangëxmaxë i Cristuarü uwanüãë

¹ Pa Chaueneëgü ya Pexũ Changechaũgüxex, jTãxü i nüxũ peyaxõgüxü i guxũma i orearü uruügü i nügü ixugügüxü na aixcüma Tupanaärü orearü uruügü yixĩgüxü! Natürü name nixĩ i penangugü i norü ore na nüxü pecuáxücèx ngoxita aixcüma Tupanaãë yĩxü i nawa idexaxü rü ëxna tama. Erü ñoma i naãnewa rü guxüwama nangëxma i muxüma i idoratèëxgüxü i nügü ixugüxü na Tupanaärü orearü uruügü yixĩgüxü.

² Rü tá pemaã nüxü chixu na ñuxãcü tá nüxü

pecuáxũ na texé tiĩxũ ya yíxema aixcũma Tupanaãe tũmawa ngẽxmaxẽ. Rũ dücax, guxũma i orearũ uruũgũ i nüxũ ixugũxũ na Tupana duũxũxũ yaxĩxẽẽxũ ya Ngechuchu ya Cristu, rũ ngẽma nixĩ i aixcũma Tupanaãe nawa idexaxũ. ³ Natürũ guxũma i ngẽma orearũ uruũgũ i tama nüxũ ixugũxũ na Tupana duũxũxũ yaxĩxẽẽxũ ga Ngechuchu, rũ ngẽma rũ tama nüxũ nangẽxma i Tupanaãe i Üünexũ. Natürũ Cristuarũ uwanüãe nixĩ i nawa ngẽxmaxũ. Marũ nüxũ pexĩnüe na ínguxchaũxũ i Cristuarũ uwanü, natürũ ñuxma rũ marũ ñoma i naãnewa nangẽxma. ⁴ Pa Chau-acügũx, pema rũ Tupanaxãcügũ pixĩgũ. Rũ marũ nüxũ perüyexera i ngẽma tama aixcũma Tupanaãrũ orearũ uruũgũ ixĩgũxũ. Erũ ngẽma Tupanaãe i Üünexũ i peãewa ngẽxmaxũ rũ nüxũ narüyexera i ngẽma Cristuarũ uwanüãe i ñoma i naãnecũãxgũwa ngẽxmaxũ. ⁵ Rũ nüma i Cristuarũ uwanüãrũ duũxũgũ rũ ñoma i naãnecũãxgũ nixĩ. Rũ ngẽmacèx ñoma i naãnechigagu nĩdex-agũ. Rũ ñoma i naãnecũãx i duũxũgũ rũ nüxũ inarũxĩnüe. ⁶ Natürũ i yixema rũ Tupanaxãcügũ tixĩgũ. Rũ yíxema Tupanaxũ cuáxe rũ tüxũ itarũxĩnü. Natürũ yíxema tama Tupanaxũ cuáxe rũ tama tüxũ itarũxĩnü. Rũ ngẽmawa nüxũ tacuèxgũ na texé tixĩgũxũ ya aixcũma Tupanaãrũ duũxũgũ ixĩgũxe rũ texé tixĩgũxũ ya Cristuarũ uwanüãrũ duũxũgũ ixĩgũxe.

Tupana tüxũ nangechaĩ

⁷ Pa Chaueneẽgũ ya Pexũ Changechaũgũxex, name nixĩ na yigũ ingechaũgũxũ, erũ Tupana nixĩ ya tüxũ ngúexẽẽcü na yigũ ingechaũgũxũ. Rũ

guxãma ya yíxema tümaẽneẽxũ ngechaũxẽ rü Tupanaxãcü tixĩgü rü Tupanaxũ tacuèx. ⁸ Yíxema tama tümaẽneẽxũ ngechaũxẽ rü tama Tupanaxũ tacuèx, erü Tupana nixĩ ya tüxũ ngúexẽécü na yigü ingechaũgũxũ. ⁹ Tupana rü ñoma ga naãnewa nanamu ga Nane ya nügümaã wüxicacü na yimagagu tüxũ nangẽxmaxüçèx i maxũ i taguma gúxũ. Rü yemawa Tupana tüxũ nüxũ nadauxẽe na ñuxãcü tüxũ nangechaũxũ. ¹⁰ Rü woo Tupanaxũ tangechaũgü, natürü ngẽma ngechaũ i guxũärü yexera ixĩxũ nixĩ na nüma tüxũ nangechaũxũ rü ñoma ga naãnewa na namuãxũ ga Nane na taxcèx nayuxüçèx rü naxütanüãxüçèx ga tórü pecadugü. ¹¹ Pa Chaueneëgü ya Pexũ Changechaũgüxex, yexguma yemaãcü tüxũ nangechaũgu ga Tupana, rü ngẽmacèx name nixĩ i yixema rü ta yigü tangechaũgü. ¹² Taguma texé Tupanaxũ tadau. Natürü ngẽxguma aixcüma yigü ingechaũgügu, rü Tupana rü tawa namaxũ rü norü ngechaũ rü aixcümaxüchi tórü maxüwa nangox. ¹³ Rü nüma rü marü tüxna nanamu ga Naãe i Üünexũ. Rü ngẽmawa nüxũ tacuèx na aixcüma norü duũxügü ixĩgüxũ rü nüma rü tawa na namaxüxũ. ¹⁴ Rü tomatama nüxũ tadaugü rü nüxũ tixuchigagü na Tanatü ya Tupana núma namuxũ ga Nane na guxüma i duũxügüxũ namaxẽxẽxüçèx. ¹⁵ Rü yíxema yaxõxẽ rü nüxũ ixuchigaxe na Tupana Nane yĩxũ ya Ngechuchu, rü aixcüma Tupanaärü duũxũ tixĩ, rü Tupana rü tümawa namaxũ. ¹⁶ Rü yixema nüxũ tacuèxgü rü tayaxõgü na Tupana rü poraãcü tüxũ nangechaũxũ, erü nüma nixĩ i aixcüma guxãxũ nangechaũxũ. Rü yíxema aixcüma

tümaëneëxü ngechaüxë, rü Tupanaârü duüxü tixĩ, rü nüma ya Tupana rü aixcüma tümawa namaxü. ¹⁷ Rü ngëxguma aixcüma Tupanaxü ingechaügügu, rü tórü maxüwa nangox i ngëma, rü täütáma nüxü tamuüë i ngëma ngunexü i nagu tüxü yacagüxügu naxcèx i tórü maxü. Erü woo ñoma i naãnewa tangëxmagü, natürü napëxewa rü Cristurüü tixígü. ¹⁸ Rü ngëxguma aixcüma Tupanaxü ingechaügügu, rü nüxü tacuèx na täütáma tüxü napoxcuexü, rü ngëmacèx taxucèxma nüxü tamuüë. Natürü ngëxguma chi nüxü imuüëgu, rü nüxü tacuèx na tama aixcüma nüxü ingechaügüxü. ¹⁹ Rü yixema rü Tupanaxü tangechaügü, yerü nüxïra tüxü nangechaü ga nümax. ²⁰ Ngëxguma chi texé:

“Choma rü Tupanaxü changechaü”, ñagügu, natürü tümaëneëchi taxaixgu, rü tidora. Erü ngëxguma tama nüxü tangechaügu i tümaëneë i nüxü tadauxü ¿rü ñuxücürüwa tá nüxü tangechaü ya Tupana ya tama nüxü tadaucü? ²¹ Rü Ngechuchu ya Cristu tüxü namu rü ñanagürü: “Yixema Tupanaxü ngechaüxë, rü name nixĩ na tümaëneëxü rü ta tangechaüxü”, ñanagürü.

5

Nüxü tarüyxera i ñoma i naãneärü ngüchaügü

¹ Ngechuchu rü Tupana Nane ya Cristu nixĩ. Rü guxâma ya yixema nüxü yaxõxë, rü Tupanaxäcü tixígü. Rü yixema Tanatü ya Tupanaxü ngechaüxë, rü nüxü tangechaü ta i guxüma i naxäcügü. ² Rü ngëxguma Tupanaxü ingechaügügu rü naxüxgu i ngëma nüma tüxü namuxü, rü nüxü tacuèx na

aixcūma nūxŭ ingechaŭgūxŭ i ngēma naxācūgū ixīgūxŭ. ³ Rū ngēxguma aixcūma Tupanaxŭ ingechaŭgūgu rŭ naga taxīnūē i ngēma tūxŭ namuxŭ. Rū ngēma tūxŭ namuxŭ rŭ tama naguxcha na naga ixīnūēxŭ. ⁴ Erū guxāma ya aixcūma Tupanaxācū ixīxē, rŭ tama ñoma i naāneārŭ ngúchaŭ i chixexŭgu tarūxīnū. Rū yixema rŭ tayaxōgū, rŭ ngēmacèx tama name i ñoma i naāneārŭ ngúchaŭ i chixexŭgu tarūxīnūē. ⁵ Rū yixema yaxōxē na Tupana Nane yīxŭ ya Ngechuchu, rŭ yixema tixī ya tama ñoma i naāneārŭ ngúchaŭ i chixexŭgu rŭxīnūxē.

Ore i Tupana Nanechiga

⁶ Rū nūxŭ tacuèx na aixcūma Tupana Nane yīxŭ ya Ngechuchu. Yerŭ yexguma ñoma ga naānewa nayexmagu rŭ dexáwa ínabaiegu, rŭ nūmatama ga Tupana nūxŭ nixu na Nanexŭchi yīxŭ. Rū yexguma curuchagu nayuxgu rŭ nagŭ inabaāgu ga Ngechuchu, rŭ Tupana rŭ wenaxārŭ inanawēx na aixcūma Nane na yīxŭ. Rū ngēxgumarŭ ta i ngēma Naāē i Üünexŭ i taguma idoraxŭ, rŭ tūxŭ nūxŭ nacuèxēē na aixcūmaxŭchi Tupana Nane na yīxŭ. ⁷ Rū ngēmaācū tūxŭ nangēxma i tomaēxpŭx i cuèxruŭgŭ i tūxŭ nūxŭ cuèxēēxŭ na aixcūma Tupana Nane yīxŭ ya Ngechuchu. ⁸ Rū ngēma norŭ wūxi nixī i Naāē i Üünexŭ, rŭ ngēma norŭ taxre nixī ga yema Tupanaga ga yexguma Ngechuchu dexáwa íbaiegu, rŭ ngēma norŭ tomaēxpŭx nixī ga yema Tupana ūxŭ ga yexguma curuchagu nagŭ inabaāgu ga Ngechuchu. Rū guxŭma i ngēma tomaēxpŭx, rŭ wūxigu nūxŭ nixu na aixcūma Tupana Nane yīxŭ ya Ngechuchu. ⁹ Nūxŭ tayaxōgū

i duũxũgũ ega ƚacũxũ tamaã yaxugũgu. Natũrũ Tupanaãrũ ore nixĩ i yexeraãcũ aixcũmaxũchi ixĩxũ. Rũ Tupana nixĩ ya tamaã nüxũ ixucũ na Ngechuchu rũ Nane yĩxũ. ¹⁰ Rũ yĩxema nüxũ yaxõxẽ ya Tupana Nane rũ nüxũ tacuèx na aixcũma yĩxũ i ngẽma ore i Tupana nüxũ ixuxũ i Nanechiga. Natũrũ yĩxema tama Tupanaãxũ yaxõxẽ rũ doratèèx nüxũ tawogũ ya Tupana erũ tama tayaxõ i ngẽma ore i Tupana nüxũ ixuxũ i Nanechiga. ¹¹ Rũ ñaã nixĩ i norũ ore ya Tupana i tamaã nüxũ yaxuxũ, rũ ñanagũrũ:

“Chomatama marũ pexna chanaxã i maxũ i taguma gũxũ. Rũ ñaã maxũ rũ Chaunegagu pexũ nangẽxma”,

ñanagũrũ. ¹² Yĩxema nüxũ yaxõxẽ ya Tupana Nane rũ tüxũ nangẽxma i ngẽma maxũ i taguma gũxũ. Natũrũ yĩxema tama nüxũ yaxõxẽ ya yima Tupana Nane rũ tama tüxũ nangẽxma i ngẽma maxũ.

CuáŨ rũ ñuxre ga norũ ucuxẽmaã inayacuèxẽ ga norũ popera

¹³ Pa Chaueneẽgũx ya Tupana Naneãxũ Yaxõgũxex, pexcèx chanaxũmatũ i ñaã ore na nüxũ pecuãxũcèx na pexũ nangẽxmaxũ i ngẽma maxũ i taguma gũxũ. ¹⁴ Rũ ngẽmacèx tama taxãneẽ na nüxna ingaicamagũxũ ya Tupana. Rũ nüxũ tacuèxgũ ega ƚacũcèx nüxna icaxgu, rũ nüma tüxũ naxĩnũ i ngẽxguma norũ ngúchaũ yixĩgu i ngẽma naxcèx nüxna icaxũ. ¹⁵ Rũ ngẽxguma nüxũ icuèxgu na nüma tüxũ naxĩnũxũ i ngẽxguma ƚacũcèx nüxna icaxgu, rũ nüxũ tacuèx ta na tüxna naxããxũ i ngẽma naxcèx nüxna icaxũ. ¹⁶ Rũ ngẽxguma chi texé nüxũ dèuxgu i tũmaẽneẽ na pecadu naxũxũ,

rü name nixĩ na naxcèx tayumüxexũ ega tama pecadu i iyanatauxẽẽxũ yixĩgu. Rü Tupana tá nanamaxẽẽ i ngẽma tümaẽneẽ ega tama pecadu i iyanatauxẽẽxũ yixĩgu. Nangẽxma i pecadu i tüxũ iyarütauxẽẽxũ. Rü ngẽxguma ngẽma pecaduwe naxũãmagu i wüxi i peeneẽ, rü tama pemaã nüxũ chixu na naxcèx peyumüxẽgüxũ. ¹⁷ Guxũma i chixexũ i ixüxũ, rü pecadu nixĩ. Natürü nangẽxma i pecadu i tama tüxũ iyarütauxẽẽxũ. ¹⁸ Rü nüxũ tacuèx, rü yixema Tupanaxãcü ixĩxẽ, rü tama pecadu taxüecha, erü nüma ya Tupana Nane rü tüxna nadau. Rü taxuacüma tüxna nangaicama i ngoxo i Chataná i tüxũ pecaduãxẽẽchaũxũ. ¹⁹ Nüxũ tacuèxgü na Tupanaxãcügü ixĩgüxũ, natürü guxũma i ñoma i naãnecũãx rü ngoxo i Chatanámxẽewa nangẽxmagü. ²⁰ Rü nüxũ tacuèx ta na ñoma ga naãnewa nanguxũ ga Tupana Nane, rü tüxna nanaxã ga cuèx na nüxũ icuèxgüxüçèx ya yima aixcümáxũchi Tupana ixĩcü. Rü norü duũxüğü tixĩgü ya yima aixcümáxũchi Tupana ixĩcü, erü Nane ya Ngechuchu ya Cristuarü duũxüğü tixĩgü. Rü nüma ya Tupana Nane nixĩ i aixcümáxũchi Tupana yĩxũ rü tüxna naxããxũ i maxũ i taguma gúxũ. ²¹ Pa Chauzacügüx, ¡Pegüna pedaugü na tama nüxũ peyaxögüxüçèx i tupanachicügü! Rü ngẽxĩcatama nixĩ i chorü ore i pemaã nüxũ chixuxũ.

Rü nuãma pexna,
Cuáũ

**Tupanaarü Ore i Tóru Cori ya Ngechuchu ya
Cristuchiga
New Testament in Ticuna (PE:tca:Ticuna)**

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022

9d5dc22a-30be-5d26-85a9-76047f4c89e6